

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj: 7/10) i člana 3. stav (2) Odluke Vlade Zeničko-dobojskog kantona o izvršenju Presude Evropskog suda za ljudska prava u predmetu Kunić i drugi protiv Bosne i Hercegovine, ap. br. 68955/12 i 15 ostalih („Službene novine Zeničko-dobojskog kantona“, broj: 6/18), Vlada Zeničko-dobojskog kantona, na 154. sjednici, održanoj 13.08.2018. godine, d o n o s i

ZAKLJUČAK

I.

Donosi se Akcioni plan aktivnosti potrebnih za izvršenje generalnih mjera naloženih Presudom Evropskog suda za ljudska prava u predmetu Kunić i drugi protiv Bosne i Hercegovine, ap. br. 68955/12 i 15 ostalih i vremenski okvir za njihovu realizaciju.

II.

Zaključak stupa na snagu danom donošenja.

Broj: 02-_____/18.
Datum 13.08.2018. godine
Z e n i c a

PREMIJER

Miralem Galijašević

DOSTAVLJENO:

1x Stručna služba Vlade,
1x Ministarstvo finansija,
1x Ministarstvo za pravosuđe i upravu,
1x Kantonalno pravobranilaštvo Zenica,
1x Ministarstvo za ljudska prava i izbjeglice,
Ured zastupnika/agenta Savjeta ministara BiH pred
Evropskim sudom za ljudska prava Sarajevo,
1x a/a.

AKCIONI PLAN

**aktivnosti potrebnih za izvršenje generalnih mjera
naloženih Presudom Evropskog suda za ljudska prava u *predmetu Kunić i
drugi protiv Bosne i Hercegovine, ap. br. 68955/12 i 15 ostalih* i vremenski
okvir za njihovu realizaciju**

I UVOD

Zeničko-dobojskom kantonu je dostavljen akt Ureda zastupnika/agenta Savjeta ministara BiH pred Evropskim sudom za ljudska prava, broj: 11-Ai-3/18-115/18 od 16.02.2018. godine, a po pitanju izvršenja Presude Evropskog suda za ljudska prava u predmetu *Kunić i drugi protiv Bosne i Hercegovine, ap. br. 68955/12 i 15 ostalih*.

Iz navedenog akta Ureda zastupnika/agenta Savjeta ministara BiH pred Evropskim sudom za ljudska prava, proizilazi da je na osnovu Presude Evropskog suda za ljudska prava u predmetu *Kunić i drugi protiv Bosne i Hercegovine, ap. br. 68955/12 i 15 ostalih*, za Zeničko-dobojski kanton nastala obaveza da obezbijedi potpuno izvršenje domaćih sudskih presuda donesenih u korist aplikanata, koje su bile predmet postupka pred Evropskim sudom, u roku od tri mjeseca od dana kada presuda postane konačna, te da u istom roku isplati 1.000 eura po aplikantu, kao i svaki porez koji može biti zaračunat, na ime nematerijalne štete i 500 eura g. Kuniću, kao i svaki porez koji mu može biti zaračunat, na ime troškova i izdataka, pretvorene u domaću valutu po kursu na dan izmirenja.

U navedenom dopisu je navedeno da je predmetna presuda postala konačna 14.02.2018. godine, i da je od ovog datuma počeo da teče tromjesečni rok u kome je potrebno izvršiti predmetnu presudu u odnosu na aplikante, odnosno sve mjere naložene predmetnom presudom u odnosu na aplikante moraju biti izvršene najkasnije do 14.05.2018. godine.

Također, Vlada Zeničko-dobojskog kantona na osnovu ove presude ima obavezu i da, pod nadzorom Komiteta ministara Savjeta Evrope, takve mjere preduzme i u odnosu na ostale osobe koje su u istom položaju kao i aplikanti.

S tim u vezi, obaveza je najkasnije do 14.08.2018. godine Komitetu ministara Savjeta Evrope podnijeti Akcioni plan o njenom izvršenju, u kome se moraju navesti ne samo provedbene individualne mjere, već i aktivnosti/mjere i rokovi za preduzimanje generalnih mjera naloženih istom.

U aktu Zamjenika zastupnika Savjeta ministara BiH pred Evropskim sudom za ljudska prava, broj: 11-Ai-3/18-199/18 od 19.03.2018. godine, navedeno je da je članom II tačka 2. Ustava Bosne i Hercegovine propisano da se prava i slobode predviđene u Evropskoj konvenciji za zaštitu ljudskih prava i osnovnih sloboda i u njenim protokolima direktno primjenjuju u Bosni i Hercegovini, te da ovi akti imaju prioritet nad svim ostalim zakonima.

Također, u navedenom aktu je navedeno, da je u konkretnom slučaju Vlada Zeničko-dobojskog kantona, kao nivo vlasti odgovoran za povrede prava aplikanata utvrđenih presudom Suda u slučaju *Kunić i drugi protiv Bosne i Hercegovine, ap. br. 68955/12 i 15 ostalih*, dužna izvršiti ovu presudu u roku koji je postavio Sud.

Isto tako, naglašeno je da ovaj rok ističe 14.05.2018. godine, a da je neizvršenje odluke Evropskog suda za ljudska prava krivično djelo propisano članom 239. Krivičnog zakona BiH („Službeni glasnik BiH“ br. 3/03, 32/03, 37/03, 54/04, 61/04, 30/05, 53/06, 55/06, 32/07, 8/10, 47/14, 22/15 i 10/15).

Stoga je potrebno da Vlada Zeničko-dobojskog kantona što je prije moguće definiše i usvoji Akcioni plan u kome će navesti aktivnosti potrebne za izvršenje generalnih mjera naloženih predmetnom presudom, i vremenski okvir za njihovu realizaciju.

Vlada Zeničko-dobojskog kantona na svojoj 141. sjednici održanoj 18.04.2018. godine, donijela je Odluku broj: 02-06-6727/18 od 18.04.2018. godine o izvršenju Presude Evropskog suda za ljudska prava u predmetu *Kunić i drugi protiv Bosne i Hercegovine, ap. br. 68955/12 i 15 ostalih*.

Članom 2. navedene Odluke Vlade Kantona, naloženo je Ministarstvu finansija Zeničko-dobojskog kantona, zbog povrede prava aplikantima, a sa ciljem provedbe individualnih mjera, hitno izvrši plaćanje obaveza prema aplikantima po Presudi Evropskog suda za ljudska prava u predmetu *Kunić i drugi protiv Bosne i Hercegovine, ap. br. 68955/12 i 15 ostalih*, a najkasnije do 14.05.2018. godine.

S tim u vezi, dana 27.04.2018. godine, Ministarstvo finansija Zeničko-dobojskog kantona je na račune advokata – punomoćnika, izvršilo plaćanju svih finansijskih obaveza prema aplikantima s ciljem provedbe individualnih mjera po Presudi Evropskog suda za ljudska prava u predmetu *Kunić i drugi protiv Bosne i Hercegovine, ap. br. 68955/12 i 15 ostalih* i o istom obavjestilo Ured zastupnika/agenta Savjeta ministara BiH pred Evropskim sudom za ljudska prava, dana 27.04.2018. godine.

Također, članom 3. gore navedene Odluke Vlade Kantona, naloženo je Ministarstvu finansija Zeničko-dobojskog kantona da svojim rješenjem formira Radni tim za izradu Akcionog plana aktivnosti potrebnih za izvršenje generalnih mjera naloženih presudom Evropskog suda za ljudska prava u predmetu *Kunić i drugi protiv Bosne i Hercegovine, ap. br. 68955/12 i 15 ostalih* i vremenski okvir za njihovu realizaciju, a vezano za obaveze Zeničko-dobojskog kantona prema drugim tražiocima izvršenja, koji nisu aplikanti iz člana 2. ove odluke, te je kao rok za donošenje Akcionog plana utvrđen 14.08.2018. godine.

Radni tim za izradu Prijedloga Akcionog plana aktivnosti potrebnih za izvršenje generalnih mjera naloženih Presudom Evropskog suda za ljudska prava u predmetu *Kunić i drugi protiv Bosne i Hercegovine, ap. br. 68955/12 i 15 ostalih* i vremenski okvir za njihovu realizaciju Zeničko-dobojskog kantona (u daljem tekstu: Radnog tima), imenovan je Rješenjem ministra Ministarstva finansija Zeničko - dobojskog kantona, broj: 07-14-17006-3/18 od 27.04.2018. godine.

Radni tim je u zadatom roku pripremio Prijedlog Akcionog plana.

Nakon toga je Ministarstvo finansija pripremlilo prijedlog Zaključka o donošenju Prijedloga Zaključka o donošenju Akcionog plana aktivnosti potrebnih za izvršenje generalnih mjera naloženih Presudom Evropskog suda za ljudska prava u predmetu *Kunić i drugi protiv Bosne i Hercegovine, ap. br. 68955/12 i 15 ostalih* i vremenski okvir za njihovu realizaciju.

II UKUPAN BROJ TRAŽILACA IZVRŠENJA

Ukupan broj rješenja o izvršenju protiv Zeničko-dobojskog kantona kao izvršenika zaprimljenih kod ASA BANKE dd Sarajevo sa stanjem na dan 12.07.2018. godine je 3050.

Prilog 1: Spisak rješenja o izvršenju po godinama na teret Zeničko-dobojskog kantona zaprimljenih kod ASA BANKE dd Sarajevo sa stanjem na dan 12.07.2018. godine.

III UKUPAN IZNOS OBAVEZA ZENIČKO-DOBOJSKOG KANTONA

Ukupan iznos obaveza Zeničko-dobojskog kantona kao izvršenika prema gore navedenim rješenjima o izvršenju sa stanjem na dan 12.07.2018. godine iznosi 147.118.831,75 KM.

Navedeni iznos sadrži: glavnica, troškove parničnog i izvršnog postupka.

Prilog 2: Spisak svih tražilaca izvršenja i ukupan iznos obaveza Zeničko-dobojskog kantona po osnovu rješenja o izvršenju zaprimljenih na teret Zeničko-dobojskog kantona zaprimljenih kod ASA BANKE dd Sarajevo sa stanjem na dan 12.07.2018. godine.

Kamate obračunava poslovna Banka na dan isplate tako da se iste u ovome trenutku ne mogu precizno procjeniti, kao ni pripadajuće zakonske obaveze po osnovu poreza i doprinosa.

IV USTAVNE I ZAKONSKE NADLEŽNOSTI ZENIČKO-DOBOJSKOG KANTONA

Članom 18., 19. i 50. Ustava Zeničko-dobojskog kantona utvrđene su slijedeće nadležnosti i obaveze Zeničko-dobojskog kantona:

„Član 18.

Kanton je nadležan, ako ovim Ustavom nije drugačije određeno, za:

- a) donošenje odluka, u okviru utvrđene ekonomske politike, za podsticanje privrednog i društvenog razvoja;
- b) uspostavljanje i nadziranje policijskih snaga koje će imati jedinstvene federalne uniforme s oznakama Kantona;
- c) utvrđivanje obrazovne politike, uključujući donošenje propisa o obrazovanju i osiguranju obrazovanja;
- d) utvrđivanje i provođenje kulturne politike;
- e) utvrđivanje stambene politike, uključujući donošenje propisa koji se tiču uređivanja i izgradnje stambenih objekata;
- f) utvrđivanje politike koja se tiče reguliranja i osiguranja javnih službi;
- g) donošenje propisa o korišćenju lokalnog zemljišta, uključujući zoniranje;
- h) donošenje propisa o unapređenju lokalnog poslovanja i humanitarnih aktivnosti;
- i) donošenje propisa o lokalnim postrojenjima za proizvodnju energije i osiguranje njihove dostupnosti;
- j) utvrđivanje politike u vezi sa osiguranjem radija i televizije, uključujući donošenje propisa o osiguranju njihovog rada i izgradnji;
- k) provođenje socijalne politike i uspostavu službi socijalne zaštite;
- l) stvaranje i primjena politike kantonalnog turizma i razvoj turističkih resursa;
- lj) finansiranje djelatnosti kantonalne vlasti ili njenih agencija oporezivanjem, zaduživanjem ili drugim sredstvima;
- m) donošenje propisa o lokalnoj samoupravi, uz odgovarajuć u konsultaciju sa općinskim vlastima.

Član 19.

U skladu sa Ustavom Federacije, Federacija i Kanton nadležni su za:

- a) jamčenje i ostvarivanje ljudskih prava,
- b) zdravstvo,
- c) politiku zaštite čovjekove okoline,
- d) komunikacijsku i transportnu infrastrukturu,
- e) socijalnu politiku,
- f) primjenu zakona i drugih propisa o državljanstvu,
- g) imigraciju i azil,
- h) turizam,
- i) korišćenje prirodnih bogatstva.

Član 50.

Vlada Kantona nadležna je za:

- a) provođenje kantonalne politike i predlaganje i izvršavanje kantonalnih zakona i drugih propisa,
- b) izvršavanje odluka sudova i vršenje svake druge nadležnosti povjerene Kantonu od federalne vlasti,
- c) pripremu prijedloga budžeta,
- d) osiguranje suradnje Vlade Kantona i ombudsmena,
- f) osiguranje da nacionalna struktura policije odražava nacionalnu strukturu stanovništva Kantona, s tim da nacionalna struktura policije svake općine mora odražavati nacionalnu strukturu stanovništva te općine,

h) vršenje drugih nadležnosti utvrđenih ovim Ustavom.“

Prilog 3.: Ustav Zeničko-dobojskog kantona sa svim amandmanima

V VISINA I STRUKTURA BUDŽETA ZENIČKO-DOBOJSKOG KANTONA

Budžet Zeničko-dobojskog kantona za 2018. godinu („Službene novine Zeničko-dobojskog kantona“, broj 1/18), iznosi ukupno 318.995.430,00 KM.

Izvršavajući ustavne i zakonske obaveze u ukupnom Budžetu Zeničko-dobojskog kantona, učestvuju slijedeći troškovi, i to:

1.	Plaće i naknade zaposlenih	54,29%
2.	Namjenska sredstva	11,17%
3.	Izdaci iz vlastitih prihoda budžetskih korisnika	1,91%
4.	Primljeni namjenski tekući transferi i donacije	0,84%
5.	Otplate kredita	4,88%
6.	Izdvajanje za socijalnu politiku i izbjeglice	7,79%
7.	Transferi Ministarstva zdravstva	0,51%
8.	Transferi Ministarstva za obrazovanje, nauku, kulturu i sport	2,66%
9.	Transferi Ministarstva za boračka pitanja	2,91%
10.	Ostali troškovi za sve budžetske korisnike (materijalni troškovi, kapitalna ulaganja i ostali transferi)	13,04%

Prilog 4.: Tabela - Učešće pojedinih troškova u ukupnom iznosu Budžeta Zeničko-dobojskog kantona za 2018. godinu.

Iz navedenih podataka proizilazi da se cca 87% Budžeta Kantona odnosi na zakonske obaveze po osnovu prava utvrđenih federalnim i kantonalnim propisima, koji se moraju izvršavati.

Također, najveći dio troškova predstavljaju izdaci za plaće i naknade zaposlenih, te boračka i socijalna davanja.

Obaveze po osnovu otplate kredita su prioritetna obaveza, a namjenska sredstva, namjenski tekući transferi viših nivoa vlasti i donacije se mogu trošiti samo za namjene utvđene drugim zakonima.

Eventualno prioritetno izmirenje svih nagomilanih obaveza po osnovu pravosnažnih i izvršnih sudskih odluka, a u iznosu većem od propisanog članom 138., stav (6) Zakona o izvršnom postupku, dovelo bi u pitanje redovno izmirivanje ustavnih i zakonskih obaveza i nadležnosti Kantona, a možda i do bankrota Kantona.

Dakle, radi se o objektivnim okolnostima, gdje Zeničko-dobojski kanton prilikom planiranja sredstava za ovu namjenu mora voditi računa i o realnom stanju priliva javnih prihoda u Budžet Kantona i o ispunjenju drugih ustavnih i zakonskih obavezama.

VI DOSADAŠNJE IZMIRENJE OBAVEZA KANTONA PO OSNOVU IZVRŠNIH SUDSKIH PRESUDA

Postupak izvršenja izvršnih sudskih presuda provodi se u skladu sa Zakonom o izvršnom postupku ("Službene novine F BiH", broj: 32/03, 52/03, 33/06, 39/06-isp., 39/09, 74/11-ous., 35/12 i 46/16).

Zakonom o izmjenama i dopunama Zakona o izvršnom postupku ("Službene novine Federacije BiH", broj: 46/16), kojim je u članu 138., stav (6), navedeno:

"Svi nivoi vlasti u Federaciji Bosne i Hercegovine (Federacija, kanton, grad i općina) koji imaju izvršne sudske presude dužni su u svojim budžetima predvidjeti sredstva za isplatu sudskih izvršnih rješenja na teret tih budžeta u iznosu najmanje 0,3% ukupno planiranih prihoda u budžetu.", te je na osnovu navedenog Zakona sa pozicije Budžeta "Izvršenje sudskih presuda", u 2017. godini iz Budžeta Kantona isplaćen iznos od 798.721,00 KM, i u 2018. godini iznos od 914.000,00 KM.

Time je u 2017. i 2018. godini planiran znatno veći iznos sredstva za navedenu namjenu, u odnosu na na Budžet Kantona za 2016. godinu kada je za navedenu namjenu planiran iznos od 420.000,00 KM.

Napominjemo, da je Vlada Kantona donijela Odluku o mjerilima za zaključivanje vansudskih nagodbi na teret budžeta Zeničko-dobojskog kantona („Službene novine Zeničko-dobojskog kantona“, broj: 13/13 i broj 02-14-12578/15 od 04.06.2015. godine), tako da je u 2016. godini po osnovu vansudskih nagodbi, nakon provedenog javnog poziva i zaključenih sporazuma o vansudskim nagodbama povjeriocima, isplaćen ukupan iznos od 419.092,00 KM.

Do današnjeg dana na ime izmirenja izvršnih sudskih presuda je za protekli period isplaćeno ukupno 7.398.843,00KM.

Od tog iznosa se na sporazume za naknadu štete odnosi iznos od 326.458,00 KM, te na isplate po osnovu 38 zaključenih sporazuma o vansudskoj sudskih nagodbi po raspisanom javnom pozivu iznos od 419.092,00 KM.

Kako i pored svih poduzetih mjera u pravcu izvršenja pravosnažnih presuda na način da se stvori „pravična ravnoteža" između javnog interesa šire zajednice i poštivanja individualnih osnovnih ljudskih prava, ZDK nije bio u mogućnosti redovno izvršavati pravosnažne presude, jer bi u suprotnom bila ugrožena makroekonomska i fiskalna održivost, a istovremeno izvršenje velikog broja pravosnažnih presuda dovelo bi u pitanje normalno funkcioniranje Kantona.

VII PRIJEDLOZI GENERALNIH MJERA ZA IZVRŠENJE PRAVOSNAŽNIH I IZVRŠNIH SUDSKIH PRESUDA

U cilju da povjerioci koji posjeduju izvršne sudske odluke na teret budžetskih sredstava Zeničko-dobojskog kantona naplate svoja potraživanja u razumnom roku, Evropski sud je u predmetnoj presudi utvrdio „da je tužena strana pored obaveze da izvrši mjere naložene predmetnom presudom u odnosu na aplikante u predmetnom slučaju dužna, pod nadzorom Komiteta ministara Savjeta Evrope, takve mjere preduzeti i u odnosu na ostale osobe koje su istom položaju kao i aplikanti i to na način kako je to naložio Ustavni sud BiH u svojoj odluci od 12. oktobra 2011. godine“.

S tim u vezi Zeničko-dobojski kanton je utvrdio tačan broj neizvršenih presuda i ukupan zbir i listu svih potraživanja, na osnovu čega je moguće procijeniti kada će povjerioci biti isplaćeni. Pored toga, vodi se centralna i transparentna evidencija potraživanja svih

povjerilaca, koja je sačinjena hronološkim redoslijedom prema datumu njihovog izvršnog naslova, na osnovu koje ASA banka dd Sarajevo vrši isplate.

Uvažavajući zahtjeve i upute Evropskog suda za ljudska prava i Ustavnog suda BiH, Radni tim predlaže da se centralna evidencija dopuni i rokovima za izvršenje, čime bi se uz adekvatna sredstva u godišnjem budžetu osiguralo izvršenje svih pravosnažnih presuda u izvjesnom i određenom roku, a Zeničko-dobojski kanton bi ispunio svoju pozitivnu obavezu iz člana 6. stav 1. i člana 1. Protokola 1. uz Konvenciju.

Uzimajući u obzir činjenice navedene u tačkama I do VI, te prava apelanata i drugih tražilaca izvršenja, kao i iznos i strukturu izdataka iz Budžeta i njegovu održivost u budućem periodu, prvenstveno ne ugrožavajući redovnu isplatu plaća i naknada budžetskim korisnicima – apellantima i ostalim tužiteljima protiv Kantona, kao i malom broju zaposlenika Kantona koji nisu tužili Kanton, po navedenom osnovu, te isplatu obaveza po osnovu prava iz oblasti socijalne zaštite i boračkih pitanja, Vladi Zeničko-dobojskog utvrđuje prijedlog slijedećih generalnih mjera za realizaciju izvršnih sudskih presuda:

1. Prinudno izvršenje rješenja o izvršenju u skladu sa članom 138., stav (6) i članom 167. Zakona o izvršnom postupku (“Službene novine F BiH”, broj 32/03, 52/03, 33/06, 39/06-isp., 39/09, 74/11-ous., 35/12 i 46/16), putem ASA BANKE dd Sarajevo, redom, prema vremenu dostave rješenja o izvršenju u Banku, u iznosu od najmanje 0,6% ukupno planiranih prihoda u budžetu za naredne fiskalne godine.

Naime, članom 138., stav (6) Zakona o izvršnom postupku, je propisano:

“Svi nivoi vlasti u Federaciji Bosne i Hercegovine (Federacija, kanton, grad i općina) koji imaju izvršne sudske presude dužni su u svojim budžetima predvidjeti sredstva za isplatu sudskih izvršnih rješenja na teret tih budžeta u iznosu najmanje 0,3% ukupno planiranih prihoda u budžetu.”.

Članom 167. Zakona o izvršnom postupku, utvrđen redosljed naplate izvršnih odluka, na način da banka vrši naplatu redom, prema vremenu dostave rješenja o izvršenju na osnovu svoje posebne evidencije redosljeda rješenja o izvršenju po danu i vremenu dostave rješenja.

Članom 54. stav 1. Zakona o budžetima u Federaciji BiH („Službene novine Federacije BiH“, broj: 102/13, 9/14-isp., 13/14, 8/15, 102/15, 104/16 i 5/18), propisano je da „isplata bruto plaća i naknada, te naknada korisnicima prava po osnovu drugih zakona, na osnovu utvrđene osnovice može se vršiti samo do visine planiranih sredstava u budžetu za te namjene.“

Zakon o budžetima u FBiH je “lex specialis” u odnosu na sve druge zakone, a što proističe iz člana 105. Zakona o budžetima u FBiH, gdje je propisano da „u slučajevima da su odredbe drugih zakona i propisa u suprotnosti sa ovim zakonom, primjenjivat će se ovaj zakon.“

2. Vansudske nagodbe ponuđene svim tražiocima izvršenja pod jednakim uvjetima u skladu sa Odlukom o mjerilima za zaključivanje vansudskih nagodbi na teret budžeta Zeničko-dobojskog kantona („Službene novine Zeničko-dobojskog kantona“, broj: 13/13 i broj 02-14-12578/15 od 04.06.2015. godine), ili izmjenjenom navedenom Odlukom, a u smislu eventualnih odricanja tražilaca izvršenja od kamata, troškova postupka, dijela glavnice ili isplate glavnice duga u ratama, te da se za te namjene planiraju sredstva u budžetu Kantona.

3. Izmjene i dopune Zakona o pripadnosti javnih prihoda u Federaciji BiH

Naime, većina obaveza Kantona nastala po osnovu tužbi radnika zbog nepoštivanja prava iz kolektivnih ugovora zaključenih na nivou Federacije BiH.

Također, pored problema primjene kolektivnih ugovora (zaključenih za područje FBiH), Federacija BiH je bez dovoljnih (a često i bez bilo kakvih) konsultacija sa kantonima donijela i niz drugih propisa kojima su nametnute dodatne nadležnosti i finansijske obaveze kantonima, a nametanje navedenih obaveza nije bilo praćeno izmjenom (tj. povećanjem)

visine učešća kantona u raspodjeli prihoda, čime su kantoni dovedeni na rub bankrota, a što je suprotno članu 3. stav (2) Poglavlja III. Ustava FBiH, gdje propisano da se «oko zajedničkih nadležnosti, kantoni i federalna vlast dogovaraju na trajnoj osnovi».

Stim u vezi, smatramo opravdanim da Federacija BiH, konačno utvrdi odgovarajuće Izmjene i dopune Zakona o pripadnosti javnih prihoda u Federaciji BiH, kojima bi se osiguralo veće i pravednije učešće Zeničko-dobojskog kantona u raspodjeli sredstava ostvarenih po osnovu indirektnih poreza i na taj način omogućilo Vladi Kantona ispunjavanje njenih ustavnih i zakonskih obaveza, pa i planiranje znatno većeg iznosa u Budžetu Kantona za izmirenje izvršnih sudskih presuda.

VIII VREMENSKI OKVIR ZA REALIZACIJU GENERALNIH MJERA

U skladu sa svojim ustavnim i zakonskim nadležnostima, Vlada Kantona je između ostalog nadležna za: provođenje kantonalne politike i predlaganje i izvršavanje kantonalnih zakona i drugih propisa, izvršavanje odluka svakog kantonalnog ili federalnog suda i vršenje svake druge nadležnosti povjerene Kantonu od federalne vlasti, pripremu prijedloga budžeta i vršenje drugih nadležnosti utvrđenih Ustavom.

S tim u vezi, Vlada Zeničko-dobojskog kantona, u skladu sa politikama Kantona određuje se o mogućem vremenskom okviru za izvršenje generalnih mjera naloženih Presudom Evropskog suda za ljudska prava u *predmetu Kunić i drugi protiv Bosne i Hercegovine, ap. br. 68955/12 i 15 ostalih*, koji će Kanton moći realizovati u narednom periodu, uvažavajući s jedne strane prava apelanata i drugih tražilaca izvršenja, a s druge strane, istovremeno ne dovodeći u pitanje ostale ustavne i zakonske obaveze Kantona, u skladu sa mjerom broj 1. navedenoj u dijelu VII ovog Akcionog plana - Prijedlozi generalnih mjera za izvršavanje pravosnažnih i izvršnih sudskih presuda, na način da se izvršenje rješenja o izvršenju vrši u skladu sa članom 138., stav (6) i članom 167. Zakona o izvršnom postupku ("Službene novine F BiH", broj 32/03, 52/03, 33/06, 39/06-isp., 39/09, 74/11-ous., 35/12 i 46/16), putem ASA BANKE dd Sarajevo, redom, prema vremenu dostave rješenja o izvršenju u Banku, u iznosu od najmanje 0,6% ukupno planiranih prihoda u budžetu za naredne fiskalne godine, do konačnog izmirenja svih obaveza Kantona po osnovu izvršnih sudskih presuda.

Broj: 02- /18
Datum, _____ 2018. godine
Z e n i c a

P R E M I J E R

Miralem Galijašević

DOSTAVLJENO:

1x Stručna služba Vlade,
1x Ministarstvo finansija,
1x Ministarstvo za pravosuđe i upravu,
1x Kantonalno pravobranilaštvo Zenica,
1x Ministarstvo za ljudska prava i izbjeglice,
Ured zastupnika/agenta Savjeta ministara BiH pred
Evropskim sudom za ljudska prava Sarajevo,
1x a/a.